



臺北流浪記

張柏恩

一九八一年生，獅子座，故鄉位於美麗的雨城宜蘭。現居臺北文山區，就讀政治大學中文系所博士班。曾獲台北文學獎、道南文學獎。持續以詩心體會生命經歷的每一齣電影。

一、北宜公路

峰青幾變袖藏涼。車過龜山送夕陽。燈亂乍疑星舞地，月明俄看夏生霜。
故山猿鶴思何永，滄海風濤望欲茫。最是多情宜北路，九彎相送入他鄉。

二、貓空纜車

雲消山色撲眉來。危嶺蒼波生面開。百里輕舟穿樹海，一行晴鳥要詩才。
悠然目引浮雲去，不覺心隨夕日回。何必微軀生健翅？凌虛絕俗沆塵埃。

三、碧潭夕眺

幾縷茶煙碧玉臨。崖亭坐眺客思深。微風日落馨香送，遠岫雲來艇影侵。
湖美我吟蘇軾句，山高誰鼓伯牙琴。春光似水迢迢去，留得歸禽說古今。

四、基隆河

誰邀落日翠河搖。我答詩聲慰寂寥。眾卉堆成春漫漫，一船劃破水迢迢。
東西鴻爪餘流水，南北龍身臥曲橋。正恐浮雲留不住，嶙峋白鷺逐波漂。

五、關渡自行車步道

蒼茫獨步雨初晴。木道通幽景色清。乍過藍天飛雁影，漫聽碧水躍魚聲。
漁人飄蕩應相識，騎士離居只自明。回首不堪行舊處，慣從寂境過浮生。

六、八里左岸

忍聽鷓鴣鳥賦歸哉！豈有伊人在溯洄？林壑四青扶冷日，潮波一白洗塵埃。
幽襟熱淚浮漚散，別夢餘生逝水哀。堤岸春光留不住，都緣輕艇蹙浪催。

七、登承天寺

如此湖山乞我憐。油桐滿壑換華顛。春流攜屐承天寺，霞醉飛花吐水煙。
斷壁嵐消千里夢，疏鐘聲渡十年緣。松濤繚繞青衿事，吹淚勾愁落素箋。

八、淡水河

唯有淡江嗚咽風。年年流恨送征鴻。已隨聲渡寒山碧，又入煙消夕水紅。
滬尾津追殘日冷，紅毛城舞晚潮空。飄零此去無多路，何處秋風起轉蓬。